

Beste Leser

Ons is tans, saam met meer as 40 ander gemeentes, besig met 'n reeks genaamd "JESUS Sê WAT?? - Sleutels tot die lewe". Dit handel oor 9 dinge wat ons wens Jesus liewers nooit gesê het nie.

*"Hoekom sou ons só iets wens?" mag jy dalk vra... Die realiteit is dat hierdie 9 uitsprake van Jesus in die eerste plek radikaal vir Sy tyd was, maar in die tweede plek dwing dit ons ook om in hierdie eeu radikaal anders te leef en te wees as die wêreld. Jesus het die sisteme van die Ou Naby Ooste in alle opsigte op sy kop kom keer. Dit is ook my en jou roeping in hierdie wêreld. Ons leef immers as mense **in** hierdie wêreld, nie **van** hierdie wêreld nie nê...?!*

My gebed is dat hierdie volgende 9 weke en 9 sleutels tot die lewe, vir jou van seën sal wees, soos dit ook vir my is.

SLEUTEL 1: AFHANKLIKHEID VAN GOD

Die werklik gelukkiges (Luk. 6:20-23)

Mat 5:3“Geseënd is dié wat weet hoe afhanklik hulle van God is, want aan hulle behoort die koninkryk van die hemel.

Wat 'n skok! Sou dit nie meer sin gemaak het om te sê: "Geseënd is dié wat aansien het, in rykdom leef en selfstandig is" nie? Nie volgens Jesus nie.

In die wêreld se oë is 'n teken van 'n sogenaamde geseënde lewe die bogenoemde dinge! In God se oë: "om arm van gees te leef" - soos sommige ander vertalings sê.

Vandag se tyd beskou ons selfstandigheid en selfvergenoegdheid as eienskappe van 'n positiewe en volwasse karakter. "Dis nie goed om van ander afhanklik te wees nie. Staan op jou eie voete - doen jou eie ding!" Jesus verskil drasties en radikaal hiervan. Selfs **Hy** wat as Koning op aarde kom leef het vir 'n tydperk, in 'n vuil stal in 'n arm gemeenskap gebore. Hy het self nie aardse rykdom gehad nie, want Hy het geweet wat ware rykdom is.

In Jesus se oë is dit juis die armes (ekonomies/sosiaal/emosioneel ens.) wat ware rykdom ken. Dis juis die mense wat niks het om op terug te val nie, wat God se rykdom intiem ervaar. Hoe kan ons dit sê? Ons kom soms in ons lewens by 'n punt waar ons nie meer weet nie - waar ons geen uitweg sien nie. Waar ons moedeloos ons skouers laat val en op moedverloor se vlakte sit. Wat sê die wêreld hieroor? "Jy's 'n swakkeling!" Wat sê Jesus hieroor? "My kind, jy's op die beste plek waar 'n mens kan wees!". **RADIKAAL** nê? Paulus het ook iets hiervan verstaan:

2 Kor 12:10 "Daarom is ek bly oor swakhede, beledigings, ontberings, vervolging en moeilikhede ter wille van Christus, **want as ek swak is, is ek sterk.**"

Dit is juis wanneer ons op daardie "ek-weet-nie-meer-nie" punt in ons lewens kom, dat die rykdom van God se krag in ons ten volle aan die werk kom. DIT is juis die tye waar ons die naaste aan God voel. Daarom kan ons sê dat dit die beste plek is om te wees in jou lewe - want dis wanneer God besonders naby voel.

Daarom is afhanklikheid 'n goeie ding - vir gelowiges, want ons het God waartoe ons kan draai. Juis wanneer ons nie op ons eie voete staan nie, juis wanneer ons afhanklik is, juis wanneer ons nie okay is op ons eie nie, ervaar ons ware rykdom. Rykdom? Ja, rykdom - dit wat van God alleen kom, is pure rykdom.

Sondag het ons gepreek oor afhanklikheid en van die kansel af die lidmate deur die Gees oortuig dat dit goed is om afhanklik te wees. Gister-aand by 'n vergadering word die gemeente se finansies op die tafel gesit - dit lyk alles behalwe goed. Ons is almal in 'n "flat-spin" - "wat nou" vra ons. En toe besef ons: *practice what you preach!* Ons is in die gemeente op 'n "ons-weet-nie-meer-nie" punt! *Ons* reaksie? "Wat nou, hoe gaan ons weer bo kom?". *Jesus* se reaksie? "Julle is op die regte plek". Miskien is die Here besig om ons te leer hoe afhanklikheid klink en werk - nie van die kansel af nie, maar uit die hemel!

My gebed is dat ons elkeen na God alleen sal draai in "ek-weet-nie-meer-nie" momente in ons lewens. Ek laat jou vir eers met die volgende vraag:

Is jy bereid om dit te waag om God te vra om jou te leer wat ware afhanklikheid van Hom is?



Toe die mense vir Teresa van Avila gelag het omdat sy met die ekwivalent van R30 'n weeshuis wou begin, het sy gesê:

"Met R30 kan Teresa niks doen nie, maar met R30 en volle afhanklikheid van God, kan Teresa enigiets doen!"

Geseënde dag vir jou!